

ALINDA eidem Notitiæ & Ptol. ibid. Ex eius Episcopis *Promachius* subscripsit Concilio Ephesino, & *Ioannes* Chalcedonensi.

AMYZON Ptol. lib. 5. cap. 2. quæ Meizo eidem Notitiæ, vulgò *Amuzo*, at *Mezo* Curopalati dicitur. *Philetus* huius Episcopus subscripsit Concilio Ephesino, & *Joannes* Amizonis Cariæ Chalcedonensi.

IASSVS eidem Notitiæ & Ptol. ibid. S. *Pietro* quibusdam vulgò dicitur. *Themistius* Iassi Episcopus subscripsit Concilio Ephesino.

BARGYLA Plinio lib. 5. cap. 29. Bargylia Ptol. ibid. quæ Barbyla eidem Notitiæ. *Dardanius* Bargylæ Episcopus subscripsit Conc. Chalc.

ALICARNASSVS eidem Notitiæ & Ptol. ibid. vbi olim Zephyra dicta scribitur, vulgò *Messi* Sophiano, & Nigro *Castel di S. Pietro*. *Iulianus* eius Episcopus dicitur apud Theodor. Lector. lib. 2. Collectan. & *Calandion* subscripsit Conc. Chalcedon.

LORYMA Ptol. ibid. mendosè Larima eidem Notitiæ, vulgò dicitur *Maxi* teste Nigro. *Georgius* Episcopus Lorymorum in Caria Concilio Constantinop. generali sexto subscripsit.

GNIDVS Ptolem. ibid. & Cnidus eidem Notitiæ, vulgò *Capo Chio* teste Sophiano, & alijs *Stadia*. *Ioannes* Gnidi Cariæ Episcopus subscripsit Concilio Chalced. necnon *Euander* Synodo quintæ generali.

MYNDVS eidem Notitiæ & Ptol. ibid. vulgò *Mentese* Leunclauio. Ex eius Episcopis *Archelaus* subscripsit Concilio Ephesino, & *Alphius* Chalcedonensi.

CERAMVS eidem Notitiæ, & Ptolem. ibidem. *Spudastus* Ceramensis Episcopus subscripsit Concilio Ephesino.

ANASTASIOPOLIS libro Conciliorum. *Elpidophorus* Anastasiopolis Cariæ Episcopus subscripsit quintæ Synodo generali.

ERISI vel Eriza Liuius lib. 36. vrbs est in Caria, vt putat Ortelius. *Papias* Erisorum Episcopus Concilio Chalcedon. subscripsit.

MILETVS Ptol. vulgò *Melaxo* dicitur, teste Molano & alijs. Ex eius Episcopis *Eusebius* subscripsit Conc. Nicæno primo.

PROVINCIA CYCLADVM INSVLARVM.

RHODVS Notitiæ antiquæ Græcæ & Ptolem. lib. 5. cap. 2. *Euphrosynus* Rhodiensis Antistes subscripsit Concilio Nicæno, *Ioannes* Rhodi Insulæ Metropolitanus legitur in Concilio Chalcedonensi, & *Esaias* in Relatione Synodi Constantinop. sub Hormisda.

SAMOS Ptol. ibidem, vulgò *Samo*. *Isidorus* Episcopus Sami in Insulis Cycladibus est in Concilio Chalcedonensi.

CHIOS Ptol. ibid. & lib. 3. cap. 15. vulgò *Scio*. *Triphon* Episcopus Chij in Insulis Cycladibus legitur in eodem Chalcedonensi Concilio.

COS vel COOS Ptol. ibid. & lib. 3. cap. 15. vulgò *Lango*. *Meliphron* Episcopus Coos in Insulis Cycladibus Concilio Nicæno subscripsit, & *Iulianus* epistolam scripsit ad Leonem Imperatorem, quæ extat parte 3. Concilij Chalcedonensis.